

**Keadaan Di Sekitar Bandaraya Terkawal Menjelang 5 Petang**  
**mStar Online**  
**Julai 9, 2011**

**KUALA LUMPUR:** Kumpulan yang mengadakan perhimpunan haram di sekitar bandaraya Sabtu akhirnya bersurai mulai 5 petang, namun polis masih berada di lokasi tertentu bagi memastikan keadaan kembali tenteram seperti sedia kala.

Menjelang 6 petang, beberapa kawasan yang sebelum ini sesak kerana menjadi tumpuan demonstrasi jalanan, menjadi lengang manakala lalu lintas kembali pulih apabila peserta demonstrasi meninggalkan lokasi tersebut.

Tinjauan Bernama mendapati polis masih meneruskan sekatan jalan raya di jalan utama menuju pusat bandaraya.

Ketua Polis Negara Tan Sri Ismail Omar memberitahu sidang akhbar di Bukit Aman, keadaan sekitar bandaraya terkawal mulai 5 petang.

Bagaimanapun, beliau berkata polis akan memantau keadaan.

Lebih 1,000 orang ditahan dalam demonstrasi itu, termasuk penganjur Datuk S Ambiga serta pemimpin parti Pakatan Rakyat.

Di Stadium Merdeka, beberapa trak yang membawa anggota Unit Simpanan Persekutuan (FRU) dilihat meninggalkan lokasi, manakala peserta perhimpunan sudahpun bergerak dari kawasan tersebut kira-kira 5 petang.

Premis perniagaan di sekitar Bintang Walk, Bukit Bintang kembali beroperasi sejak 3.30 petang, manakala pelancong asing dilihat berada di kawasan yang menjadi tumpuan.

Hakcipta Terpelihara © 1995-2011 Star Publications (Malaysia) Bhd (Co No 10894-D).

Source:

[http://mstar.com.my/berita/cerita.asp?file=/2011/7/9/mstar\\_berita/20110709192710&sec=mstar\\_berita](http://mstar.com.my/berita/cerita.asp?file=/2011/7/9/mstar_berita/20110709192710&sec=mstar_berita)